

四庫全書

史部

欽定四庫全書

史部

宋史全文卷三十六

詳校官編修臣潘廷筠

編修臣裴謙履勘

總校官降調編修臣倉聖脉

校對官助教臣卞維吉

謄錄監生臣張同履

欽定四庫全書

宋史全文卷三十六

宋理宗六

己未開慶元年正月乙巳朔詔朕臨御以來于今三紀
小心翼翼夙夜不敢康寧方今國事正殷四郊多壘環
視宇內罕如人意皆前日因循苟且養養偷惰滋至於
今可不戒哉載更丕化肇紀新元賴爾股肱惟良暨中
外小大之臣茂迎天運相與維新以公心奉公法以實

政圖實效使元氣壯而精神衛中夏安而遠人服庶幾
祖宗開寶慶厯之盛則予一人以懌 都省言蜀報日

急寇犯忠涪浸迫夔境詔蒲擇之馬光祖應戰守調遣

照便宜指揮行 辛亥都省言戍蜀官兵頻年戰禦酷

暑隆冬暴露可憫合與更戍今正當捍禦之時詔蒲擇
之加撫重犒候防春畢日更替 癸丑詔呂文德築城

黃平深入蠻戎撫輯有方進官三等 庚申李曾伯奏

蒙古犯雖筦知濱州呂振龍知象州奚必勝輒離官守而

道橫州守臣劉清卿乃能設隘堅守一郡按堵詔振龍
必勝並追毀拘管外州清卿進官一等 壬戌上曰北
騎盤泊涪州不可不速為驅逐之計大全奏今日備禦
莫切於兵與食 癸亥大全奏士大夫干請州郡者甚
衆上曰遴選人才宰相責也千里之寄未容輕畀宜審
處之 以雪寒出封樁庫十八界楮幣二十萬賑三衙
諸軍 丙寅上曰海道戍兵雪寒可念與在城寨者不
同可量與給犒一次大全奏敬遵聖旨 丁卯詔賈似

道以樞密使為京西湖南北四川宣撫大使都大提舉
兩淮兵甲湖廣總領知江陵府時蜀帥蒲擇之以重兵
攻城都不克敵人傾國舉兵南伐破利州隆慶順慶諸
郡閬蓬廣安守將相繼降北又為浮梁於涪州之蘭市
蜀道梗絕故有是命 辛未上曰中外之兵皆貧蜀兵
尤甚驅餓卒而嬰強敵其不誤事者幾希大全奏舊歲
行下蜀閬增支口券正為此也 壬申上曰郭濬一兵
帥庶實可取士大夫亦難其人且當留之維揚 癸酉

雷 上曰昨日降出白劄子中間言湖南築城欲勸富民助之決不可先須節帖去此一段大全奏聖天子仁民一念上通于天 己巳以權吏部侍郎兼國子祭酒權直學士院張鎮知禮部貢舉起居郎兼侍講吳衍太常少卿兼權中書舍人王景齊同知貢舉左司諫沈炎監試 二月乙亥朔御札付知貢舉張鎮已下擇體國籌邊尊主庇民之學 詔京湖制置司參謀官王登素懷忠義累著勲勞提兵援蜀曾不辭難功未及成而歿

特贈官五等合得致仕恩外更官其一子 己卯上曰
朕自即位以來嘗以憂勤為心未嘗一日以位為樂大
全奏昔文武始於憂勤終於逸樂今聖心一於憂勤過
文武遠矣 乙酉上曰向士璧提師已到忠州忠赤可
取大全奏當國家多事之時正臣子捐軀報國之日若
人人能如士璧之忠則邊事不足慮矣 詔疆場未戢
調度尚繁出內庫十七界楮幣三千萬以助支賞 丙
戌以馬光祖為資政殿學士沿江制置大使江東安撫

使知建康府 丁亥上曰蜀中之警皆因馬湖江不能
設備縱其偷渡今江之南北皆有哨騎所以重費區處
壬辰都省言州縣之間多行苛政獄訟又且淹延非
所以愛民也有詔令御史臺下諸路提刑司戒飭令務
要政平訟理違許按劾以聞 出平糴倉米二萬九千
九百石有奇賑都民 三月己酉都省言北兵見在涪
州蘭市大渠縛橋及在江南作過姦謀叵測合行痛勦
乞立賞格以激將士詔如能出奇斫橋襲寨有顯著者

旌賞有差 癸丑上曰蜀中死節之士如雲頂山等處
將士皆當褒錄其後庶可為天下勸大全奏謹遵聖訓
丁巳以呂文德為保康軍節度使四川制置副使知
重慶府 戊午上曰近有言備邊之策當於江北做規
模不當於江南做規模大全奏今日處處風寒皆當預講
又豈止於江北 辛酉雨土 己巳上曰向士璧捐家
貲百萬提師援蜀殊可嘉尚近日賈似道移司荆蜀犒
軍尤重厚不易得也大全奏大抵用兵行師以輕財為

先 四月乙亥都省言段元鑑楊禮堅守城壁歿於王

事忠亦可褒詔各贈節度使封二字侯立廟致仕恩外
更官其一子 甲申上曰昨日李遇龍之報言王堅忠

節守城拒敵萬折不回真可為列城之倡更當旌賞大
全奏敢不欽承聖訓 乙酉都省言知施州謝昌元自

備百萬緡米麥千石勦築城壁于倚子山合與推賞詔
進官一等 辛卯朝獻景靈宮 詔諸道提點刑獄以

五月按理囚徒 五月庚戌上曰監司郡守儻果循良

只宜因任不必數易以重州郡將迎之費大全奏敢不
上遵聖訓 辛亥上曰諸蠻乃羈縻之國且與疆敵為
鄰不可不申飭邊郡以固結其心大全奏此事已累次
行下 乙卯宣司奏蜀江雪漲水冒橋趾呂文德等與
宣司所調兵數戰皆克攻斷浮梁詔立功將士遷補有
差 以權工部侍郎兼侍讀翁應弼秘書少監兼權直
學士院崇政殿說書洪芹秘書郎兼資善堂直講史若
訥為殿試詳定官 丙辰御集英殿策進士 丁巳御

後惺閱武舉進士射 乙丑詔鑄新錢以開慶通寶為
文 戊辰上曰呂文德將達重慶合渝守城之賞不可
緩大全奏欲待文德申上斟酌推賞上曰亦須先降指
揮以激昂將士之氣 辛未賜正奏名進士周震炎以
下四百四十二人及第出身同出身 壬申賜特奏進
士三百九人 六月甲戌宣司奏呂文德乘風順戰勝
遂入重慶 御筆蜀事方殷軍力勞瘁披堅者疲於戰
鬪服業者苦於流離間有脅從亦非本志興言及此痛

在朕心聿新閫權期復舊觀仍降詔撫諭 御筆呂文

德身先士卒攻斷橋梁蜀道已通忱可嘉尚令學士院

降詔獎諭 辛巳以朱熠為參知政事饒虎臣同知樞

密院事 己亥上曰呂文德入重慶既畀之以閫寄又

寵之以齊鉞可謂榮矣猶未肯領何也大全奏文德受

國厚恩正捐軀報國之日此番宋良信賁印授往不容

辭矣 御筆賈似道將指于宣勇往就道遣援軍餉動

中事機曾日月之幾何覺氣象之頓異賢勞忠赤委有

可嘉令學士院降詔獎諭 辛丑上曰呂文德力辭閫

寄可敦勉之况合州之圍已解亦其應援之力大全奏

君命豈可有辭之理終須領職 壬寅太白晝見 七

月丁未上曰日來郡守多不安於久任坐席未溫便欲

謀進大全奏更迭祖宗成法亦須民庸既著方可寘之

朝列 辛亥太白入井 戊午詔四川選人應闕陞磨

勘改官銓審守臣申辟倅令可從舊隸宣司審量 癸

亥以蔡抗薨輟視朝 甲子上曰蜀閫之命文德尚辭

恐失事機大全奏聞已遣兵遣將况蒲擇之既出峽尤不可辭其責八月壬申朔上曰蒲擇之已出峽文德未肯受命賴李遇龍任責經理但糧頗艱宜急催趣大全奏當下宣司俾承聖訓詔令戶部下諸路申嚴州縣增收租米斛面之弊丙子上曰近聞邊閫科降之數頗多只得挨那應之大全奏邊面既闊備禦亦廣科降之數十倍常時所仰者楮耳印造多折閱之患不容不預為之慮丁亥上曰兩日之雨如傾深為歲事之

憂夜來幸稍霽大全奏此皆聖德所感庶穡事不壞於
垂成 戊子上曰江塘近為潮水衝決宜急修整大全
奏昨日顧岳過臣已面趣之 丁酉上曰連日之雨恐
害穡事大全奏朝廷寬恤之政已備講行復命從臣禱
于羣祠 庚子上曰且喜晴霽歲事可保大全奏此皆
陛下力行好事感格如此是夜太白犯權火星 乙巳
都省言兩浙雨多詔漕司行下諸郡縣守倅令佐親詣
寺觀神祠精加祈禱 是日蒙古犯澣黃州攻圍鄂渚

壬子賈似道奏水陸之師至于鄂時韃國兵大入值沿江制副征魚湖利虐甚漁人獻舟於北遂自黃州沙武口透渡江南中外震動 丁巳上曰聞魚湖清野不早致被北騎衝突奪民船為筏在江面作過不可不亟為之備大全奏須得上下流戰艦夾擊方可遏其勢已下宣司江閫矣 右諫議大夫戴慶炯奏濱江一帶兵衛單弱向裏防拓路頭散漫事勢豈可與尋常哨掠者同日語今須急作規模大為措置引咎責躬痛自克勵以

振起天下忠臣義士之氣博求謀畫號召材武使吐奇
計出死力以衛社稷亟命宣閫副閫水陸夾擊共期肅
清詔從之 庚申以觀文殿大學士宗國公吳潛為醴
泉觀使兼侍讀奉朝請戴慶炯為端明殿學士簽書樞
密院事 御筆朕德不類寇闖上流省躬引咎惟自克
責然祖宗深仁厚澤涵養之天下豈無忠臣義士奮勵
感發出力以衛社稷者諸閫各擁良將勁兵亦當同謀
叶智勿以限界為拘共圖偉績可降詔勉諭尋詔出內

庫楮幣一千萬銀絹五百疋兩付宣司楮幣五百萬銀
絹三萬疋兩付副司支費仍備黃榜軍前曉諭所調淮
東五萬兵令監察御史陳寅催促進發 癸亥以趙葵
判慶元府沿海制置大使 乙丑詔鄂渚事勢殊急更
令侍御史沈炎往沿江制副司督趣調兵再出內庫楮
幣五百萬銀絹二萬疋兩付兩淮制司楮幣二百萬銀
絹一萬疋兩付沿江制司支費 丙寅詔上流事急令
侍從臺諫卿監郎官赴都堂集議以聞 以賈似道無

節制江西二廣人馬通融調度應援上流馬光祖進司
江州史崖之進司壽昌軍 丁卯以邊事孔棘命羣臣
奏告天地宗廟社稷宮觀嶽瀆諸陵 戊辰太白犯熒
惑 十月壬申丁大全罷以觀文殿大學士判鎮江府
以吳潛為左丞相兼樞密使賈似道為右丞相兼樞密
院使茂國公宣撫大使等如舊以趙葵為江東宣撫大
使 庚辰御筆令學士院降詔自今月十一日為始避
殿減膳徹樂以示朕抑畏之心 詔合圍已解坤維頗

清皆宣聞指授之功與制臣調遣之力以至二三大將竭盡忠勞遂使百萬生靈免罹塗炭勲庸甚懋旌賞宜優呂文德特授檢校少師李遇龍進官三等權刑部侍郎各賜金幣將佐以下進秩賜金有差辛巳御筆令學士院降詔撫諭四川將事軍民務在懇切以示朕眷焉西顧之意詔曰北兵侵犯中原如江北岸黃州漢陽軍江南岸鄂州壽昌軍興國江州隆興諸州多有驚移百姓遷城郭之人切恐無以自給仰三省行下各郡

不拘是何窠名見管錢米隨宜賑恤不許漏落泛濫有失朝廷推行實惠之意如有違戾重寘典憲 壬午詔

袁玠奪五官送南雄州居住以御史陳寅言其屠害良民苛取漁舟以資敵之鄉導也 癸未詔以蜀道甫寧

監司州郡調度不給其來歲進貢天基聖節銀特免

甲申以向士璧為湖南安撫使知潭州任責捍禦 詔

丁大全落職罷新任以諫臣曹永年再䟽其罪也 乙

酉雷十一月庚子朔都省言蒙古謀幹腹拓裏當嚴湖

南諸郡土豪及諸峒俊傑其間豈無奮發忠義秉功之人合立賞格招諭從之是日呂文德提兵至鄂詔賈似道移司黃州先是諸路重兵咸聚於鄂北軍幹腹一道由全永至潭州江西震動監察御史饒應子言今精兵健馬咸在閩外湖南江西地闊兵稀雖老臣宿將可以鎮壓然無兵何以運掉敵之來當自內托出不當自外趕入上然之遂有是命黃在鄂中流乃北騎往來之衝危道也大將呂文德遣孫虎臣將精兵七百護送至

類草坪候騎曰前有兵似道愕然曰奈何虎臣匿似道
自挺身出戰既而北軍乃老弱部所掠金帛子女降將
儲再興騎牛先之虎臣擒再興遂入黃州下流之兵始
振 辛丑詔行寬恤十有三事 壬寅以朱熠兼權知
樞密院饒虎臣戴慶炯權參知政事 癸卯以夏貴兼
金吾衛將軍總領淮東出戍軍馬 趙葵言北兵渡江
皆因袁玠尅取漁湖之利極其慘酷雖已行罰未足以
正誤國之罪詔袁玠追毀除名勒停拘管萬安軍 丁

未詔北兵渡江多有被擄之人驅逐攻打城壁及當前鋒豈其本心良可痛念又上流失業者其間豈無土豪彊壯或轉為剽掠是致資敵各立賞格招諭 戊申御筆朕以國家多難下詔責躬避殿減膳徹樂罷土木出官人痛自貶損益務儉約以至黜貪暴省賦歛釋禁錮恤冤枉庶幾悔過之實感動天人之心尚慮言路之未通莫紓人情之久鬱可令內外臣庶凡目前急致要務朝廷闕失並許極言毋隱以副朕側身引咎之意令學

士院降詔 詔出內庫楮幣五十萬犒內外諸軍 甲寅以與憲為浙西制置大使知鎮江府杜庶兩淮制置使知揚州 乙卯詔丁大全奪三官以御史朱貌孫疏其罪也尋再削奪 己未以趙葵為少保江東宣撫大使節制饒信臨江撫吉官軍民兵 庚申詔朕有虎臣時為文德今其部曲將夏貴提師征行道出輦下所當撫勞以示優恩令閤門引見 閏十一月癸酉雪出封椿庫楮幣二十萬賑都民三衙諸軍亦如之 辛卯賈

似道奏諸將大捷于鄂城鄂圍解凡百餘日 以呂文
德為檢校少傅京西湖北安撫大使兼制置使知鄂州
乙未與憲言連水失守孫逢吉棄城而歸已行軍法
策應棄再遇不能應援詔奪三官與憲尋與宮觀十
二月辛亥詔以來年正月一日改為景定元年 壬子
吳潛改封許國公賈似道改封肅國公 庚申羣臣請
御正殿復常膳表三上乃從之 詔鄂渚之重圍雖解
湘潭之凱奏雖馳然四境未底於肅清三軍方疲於戰

關人民離散井邑摧殘每一念之寸心如灼其天基聖
節稱觴賜宴並免 壬戌陳韡落致仕以觀文殿學士
充醴泉觀使無侍讀徐清叟以資政殿大學士提舉佑
神觀無侍讀趙汝騰端明殿學士提舉佑神觀無侍讀
無翰林學士承旨

庚申景定元年正月丙子御筆賈似道親提大兵以解
鄂渚之圍勲烈之盛良用嘉歎可令學士院降詔獎諭
詔賈似道赴關 庚辰詔呂文德為檢校少傅京西

湖北安撫大使兼制置使知鄂州 是夜歲星熒惑合

于尾 乙酉都省言潭州醴陵縣當衡州之衝比北兵

迫近草寇竊發人情危疑知縣吳灼屹然不動誅鋤盜

賊一境獲安詔吳灼差監行在都進奏院 甲辰都省

言承平日久京師城池所當修浚詔厲文翁條畫行之

己酉詔鄂州戰守將帥以至士卒特賜十七界楮幣

三千萬令宣司第功給犒呂文德援蜀之賞未足酬功

今援鄂之勲尤為顯著特賜百萬良田萬頃高達秉城

拒守迄退疆敵特賜五十萬為寧江軍承宣使王鑑陞
左金吾衛上將軍孫虎臣蘇劉義黃青陳萬鄖進張勝
孟之經徐廣溫和俞大忠康玉馬汝海趙紀祥各進官
十等為遙郡團練刺史環衛閣職有差陳奕阮思聰水
陸戰禦獲捷非一並為防禦使湯孝信紀智立提兵援
鄂備宣勞效各進官三等王益進一秩 壬子詔蒲擇
之削官三等沈翥送瓊州居住 甲寅都省言臨江軍
瑞州皆以無城池為北兵破臨江守臣陳元桂端坐亭

上誓死封疆左右散去為兵所執握拳切齒罵聲不輟
忠義之節照映古今瑞州守臣陳昌世以治郡有善政
百姓擁之以逃詔元桂進官五等贈寶章閣待制與二
子京官選人恩澤賜錢十萬立廟賜正節昌世素有廉
平之譽姑奪官三等 丙辰命從臣卿監日一人禱雨
于天竺山即官詣霍山 出內庫楮幣一千萬御莊米
一萬石付厲文翁修築城池 庚申雨雹 壬戌詔賜
賈似道金器幣一千匹兩仍趣赴闕 都省言廣南哨

馬透出湖南衡州上由潭鄂而合興壽之兵下由醴陵而犯袁吉之境向士璧會合劉雄飛追襲之兵調遣鄧進閻忠進彭宋傑等併力攻勦獲戰馬千餘足救回老幼甚衆詔士璧為兵部侍郎雄飛進官二等保康軍承宣使進宋傑忠進各進官賜銀絹有差 丙寅南康軍言北哨入建昌縣狗咬石透過武寧本軍都監張興宗調兵迎敵戰死詔贈興宗武翼郎官其一子 都省言去冬北兵侵犯湖南諸將迎敵之功溫和不為最李虎次

之鄮進又次之詔溫進右武大夫帶行遙郡刺史李
虎進官三等帶行閣門宣贊鄮進帶行復州團練使賜
銀絹有差 三月戊辰朔日有食之 庚午御筆命夏
貴無黃壽策應使總統諸將令協力會合夾擊以收全

捷 癸酉都省言去年八月哨馬侵犯橫山鎮撫司調
遣總管張世雄提兵將迎敵戰歿詔世雄等各贈官十
等賜錢一萬 甲戌詔夏貴總統舟師自鴻宿州而上
凡五奏捷進福州觀察使 都省言北兵所犯州縣或

經從蹂踐或盤礴焚毀農民失業其鄂州壽昌軍已行
蠲放租稅餘州縣當一體寬恤 詔全岳永衡賓柳象
瑞州興國軍南康軍建昌縣隆興府奉新奉寧武寧靖
安縣江州瑞昌德安縣臨江軍清江新喻縣潭州醴陵
瀏陽縣開慶元年以前二稅並捐之 辛巳詔董宋臣
改差提舉台州崇道觀安吉州居住 國子博士徐庚
金等不待君命而出關遣官勉諭而莫應各與在外差
遣 丙戌詔孫虎臣和州防禦使范文虎張世傑等各

進官五等賜銀絹有差餘將士進官二等 四月戊戌

朔左丞相吳潛罷行諫議大夫沈炎之言也 詔多事

之時揆席不可暫虛可趣似道赴闕權令朱熠戴慶炯

分日當筆有大政事共議以聞 辛丑賈似道奏鄂圍

始解江面肅清宗社危而復安實萬世無疆之休 壬

寅趙葵以病乞結局引退從之 癸卯御筆賈似道為

吾股肱之臣任此旬宣之寄殷然殄患奮不顧身戎乘

一臨士氣百倍吾民賴之而更生王室有同於再造予

嘉偉績宜示褒綸令學士院降詔獎諭 乙巳詔以邊

事清肅請命元祈禱官各詣致謝 丙午呂文德兼湖

廣總領 辛亥揚州火杜庶貶官一等 癸丑以賈似

道為少師進封衛國公其宣司職事令結局朱熠知樞

密院事兼參知政事饒虎臣參知政事戴慶炯同知樞

密院事兼權參知政事皮龍榮端明殿學士簽書樞密

院事 甲寅詔似道將至國門可依文彥博例郊勞於

都城外賜御筵及朝見後擇日對御賜宴似道皆辭從

之 乙卯朝獻景靈宮 丁巳以明堂大禮奏告天地

宗廟社稷宮觀 詔以今年九月有事于明堂 己未

詔夏貴為保康軍承宣使左右金吾衛上將軍知淮安

州兼淮東安撫副使京東招撫使尋賜金器幣田三千

畝 乙丑似道入見奏今天下之勢保藩籬則下可保

堂輿有三邊則可有內地惟陛下念之 五月戊辰朔

詔似道奏乞以財賦獄訟委之執政分任亦合典故可

令朱熠專任財賦皮龍榮專任獄訟似道總提其綱

以趙葵為兩淮宣撫大使判揚州進封魯國公 辛未
詔饒虎臣為資政殿學士提舉洞霄宮 癸酉御筆令
之天下靡弊極矣所可以轉移變化者獨有用人一說
耳舊來當國者用人多徇私意貽害可勝言哉今丞相
虛心無我詢之同列以用人此乃轉亂為治轉危為安
一大機括也機括若差利害匪輕今當立為一準的之
說須專求實用勿泛取虛名外之為監司郡守者當用
廉潔凡稍涉貪汙而謀利者汰之內之為朝士者當忠

謹樸實凡稍涉譁競而沽名者汰之若用捨之意嚮明
白貪汙者可化為廉潔譁競者可化為忠樸夫苟用人
一差待其貽毒於民貽害於國而後去之亦已晚矣似
道奏敢不備遵眷旨仍乞宣付史館 甲戌都省言沿
江副司詔議官呂文信統兵在檣林夾白鹿磯呂輔周
並以戰歿詔贈文信寧遠軍承宣使輔周和州防禦使
優與恩澤立廟賜額 乙亥詔李虎馭軍無律害民特
甚合正典刑以曾立功湖南貸命追毀羈管鬱林州行

諫議大夫沈炎之言也 丁丑賜似道玉帶 己卯以

戴慶炯薨輟視朝 辛巳上曰近日士大夫奔競之風

可畏須擇一二恬退之士奏聞庶可以勵其餘似道奏

已得二三人俟擬進尋詔趙景緯歐陽守道陳大中有

靜退之節以景緯為祕書郎守道史館檢閱大中主管

禮兵部架閣文字 壬午熒惑犯斗 癸未都省言江

防至重貴在嚴密自通州海口以至歸峽當分管地分

庶責有所歸詔令都統司分地任責仍命制帥司照所

隸節制 以皮龍榮無權參知政事沈炎為端明殿學士同簽書樞密院事 戊子似道言去秋猾夏之變匪由天降生自貪吏臣願明詔中外自今守臣當覺察諸縣監司當覺察守倅其有贓犯必劾無貸如州縣官為監司所劾則坐郡守守倅為臺諫所劾則坐監司 己丑上諭似道卿昨日所陳正律貪之良法連坐之罰此風必戢似道奏臣之所奏祖宗已行之法也 庚寅都省言獎廉戢貪今日急務陳堦清節高風可厲流俗陳

振孫華髮典刑為國壽俊詔以壇為龍圖閣學士賜振
孫金帶 乙未上曰秋防在近趙葵既辭不可不速擇
人不若只用李庭芝詔庭芝復主管兩淮安撫制置司
知揚州趙葵充醴泉觀使 六月己亥詔郭濬獨任殿
步兩司宣勞不一自去冬警報以來效忠甚著進官一
等帶行遙郡刺史 詔丁大全居住南康軍 壬寅御
筆皇子忠王仁孝恭順有聞於時涵養踐修尤敏於學
是用蔽自朕志庸正儲闈特以對越在上庶幾祖宗顧

敬神人闔澤哀時多祉予以隆萬世不拔之基可立為
皇太子令有司討論典禮以聞 癸卯上曰昨日皇太
子再三辭因訓之曰元良者天下之大本也乃若祗膺
重器克荷徽章必務保其令名蘊其全德欲全其德在
修其身欲修其身任勤於學勉之毋忽似道等奏建儲
之始聖訓昭明實足以貽謀萬世 甲辰上諭似道卿
所奏皇太子班次在宰執之上且候典禮後行之似道
奏名稱既正典禮當遵容臣具奏 上曰淮東近別無

報似道奏連水事當候夏貴報至兵固貴於神速然必
須新聞之來方可隨宜應援上曰然 戊申以王埜薨
輟視朝 月犯斗 己酉錄行在繫囚 壬子詔陞巢
縣為鎮巢軍 甲寅詔皇太子改名令所司備禮冊命
尋賜字曰長源 詔賈似道為禮儀使朱熠撰冊文皮
龍榮書冊沈炎篆寶 乙卯上曰皇太子入儲官禮儀
從厚如賜宴錫賚等事皆當討論似道奏舊典有諸王
入府錫宴及皇太子會燕官僚於資善賜教坊樂之類

今日而行之足稱盛典 丁巳皇太子辭朝謁秉金輅
設儀仗從之 戊午以冊皇太子奏告天地宗廟社稷
宮觀 己未詔倪厚獻羨希賞再削一官仍下監司郡
守今後有許移易窠名輒行獻羨者照祖宗典故行仍
著為令 辛酉皇太子辭百官移班賀詔既有典故不
必引辭 乙丑御筆朕於菁莪樂育之仁封培滋久登
撫仕著休聲多此途出數年以前間有聚為朋曹墮家
敗業而不能遏然自棄者豈作成之道猶有缺乎批付

學官以更學法來上稍示規益本為一二蹈于匪彝者
設也邇者涵濡德義莫不自待以厚朕甚嘉之前者更
法獨進取一途尚狹未足以快飛躍之道今從其厚用
著為令爾諸生益務自修副朕崇尚作成之美意敬聽
無忽 七月戊辰制以皇子忠王為皇太子大赦天下
北使郝經來尋盟至維揚拘留真州不遣先是開慶
己未秋九月北兵渡許黃圍鄂州賈似道視師江上陰
許北朝歲幣議和亦會北有大喪北師始歸似道入相

自詭有再造之功諱言前事故也

謚議曰己未庚申北軍過江東南之危如一髮引千鈞矣似道在鄂為城下之盟許納歲幣而北師始歸似道乃欺理宗詭曰戰勝而所許歲幣又食前言是外則負大國內則欺其君以致大國遣使責償似道乃拘留於真州惟恐上下知之未幾而大元再遣使京湖而似道又留之漢陽之沌口始則請盟終則背盟似道知之天下知之獨朝廷不知耳

庚午上問近日京城米價似道奏見行賑濟以平市價此去秋成糴價必減 壬午皇太子宮詹事楊棟等奏乞詔皇太子免荅拜禮御筆尊敬師儒宜全謙德難

允所陳 癸未御大慶殿冊皇太子羣臣班賀 丁亥

皇太子朝謁太廟御筆參稽舊制皇太子當俾習知政
事每遇昕朝可令侍立仍令宰執並兼東宮官三省討
論典故以聞 己丑上曰何夢然一疏言大全潛二凶
敗君無君之罪舉盧杞李林甫以為證極當似道奏臺
臣所乞合取聖意上曰褫職罷祠追官一如其請竄地
却只置之江西 以賈似道兼太子少師朱熹皮龍榮
沈炎並無賓客 辛卯詔丁大全奪官三等居住南安

軍吳潛褫職罷祠奪二秩居住建昌軍 皇太子奏乞
免侍立等事御筆參決侍立家法攸傳控奏力辭難從
所請 上曰來日皇太子侍立卿等奏擬須擇其有關
於大體者如漢舉孝廉之類似道奏敢不敬遵聖訓

癸巳皇太子侍立上曰侍朝參決正欲習聞政事卿等
宜衛翼之似道奏建儲一事自古為難在仁皇時猶侍
司馬光范鎮諸臣之請今陛下不俟臣庶論建斷自聖
衷合天地祖宗之心為社稷億萬斯年之計上曰舉孝廉

所以化元元移風俗也此事久廢民罔攸勸可下郡國
各舉一二人務以實聞尋令學士院降詔勅門下孝為
百行之先廉居四維之一三代以上風俗淳而孝廉之
名泯迨漢始詔以此舉士當時二千石不舉孝以不敬
論不察廉則免其嚴且重如此我國家以孝治天下以
廉察吏治科雖不常設固有不待舉而勸者比年以來
澆風汙習瀾倒莫返朕甚憫焉然念良心所蘊誰獨無
此特為善者無所勸不善者莫知過表厲之道未至焉

耳今嘉與宇內之士同歸于善舉孝廉如漢法夫孝廉一本也好貨財而不得為孝哇母食則不得為廉以菽水為樂者行必不汙以冰蘖自持者親必不辱詔下之日凡吾帥守監司令長采公論攷實行各䟽其事以名聞朕將尊顯之以為臣子之勸 八月丙申朔上曰戢貪之令屢下良以行貨之心多於畏罪論罷既科而貨不失猶足為利也繼自今有犯贓者須重寘于憲盡監其贓務在必行毋為文具 丁酉以賈似道為明堂大

禮使皮龍榮為儀仗使沈炎鹵簿使與芮橋道頴通使
辛丑詔廣安軍新明知縣鄭少清流海外侯瑩孫教
官謝少鏐羈管廣南渠州鄰山知縣楊淑廣安錄參朱
堃司法馮巽午居住廣南以宣撫司克復舊城言其結
附蒲元圭獻城降北之罪也 丙午上曰皇太子每日
聽講必待講官講說方可發問如有所疑須當咨問太
子於侍次欽承惟謹似道奏前日叨陪講席親聆皇太
子聽講之餘首問君子訥於言而敏於行次問聞正言

行正道講官敷說樂聽不倦可謂得問辨之要上曰兩問皆當 壬子以與憲薨輟視朝贈少師尋謚忠惠

是夜太白入房 癸丑上曰浙西鹽子頗為田里之擾

宜早區處若徒黨能自捕其首者却與免罪仍厚賞之似道奏令憲帥下之所屬措置招捕 九月辛未詔鑄

新錢以景定元寶為文 癸酉上曰劉整瀘州之捷甚

偉似道奏觀其所申俘獲甚衆恐此冬間勢須平定

己卯朝獻景靈宮 庚辰朝饗太廟 辛巳大饗于明

堂赦天下 丙戌上曰明禋一晴可喜宿齋之旦已有

雨意隨即開霽似道奏此皆陛下風采精神沈固應天
眷如此 是夜熒惑犯壁 丁亥上曰諸路刑獄尚爾

淹延所當嚴行戒飭似道奏謹承聖訓 戊子李松壽

犯淮安 十月乙巳御筆昨臺臣論丁大全吳潛欺君

無君之罪皆有一事實初匪風聞竄謫近止江西可謂寬

典頗聞二佞之黨懷設伏隱布在京城聞有朝紳各私

所主有咎及朕躬者是何忍於負君而不忍於負私門

也如大全之流毒稔禍害民蹙國此天下四海所同憤
固不待論若吳潜力比大全動搖國本力請遷幸發言
悖亂蘊志深險與自古奸叛之臣曾不必殊朕之所親
受而忍抑者凡為臣子豈當黨附而為是翕訛近又作
歌詩有披緇之說此等情狀畢露恐亦終難涵容今臺
臣覺察如有似此者劾上當重寘于罪以為同惡相濟
者之戒仍榜朝堂 壬子李庭芝言夏貴等破松壽之
兵於連水城下南城舊址已盡平之尋詔夏貴進官五

等賜錢百萬立功將士進官有差 壬戌詔吳潛居住潮州以監察御史桂錫孫之言也 十一月乙丑御筆

朕於此司惟遵祖宗之舊例給使而已未嘗有所假借亦每有戒飭聞士大夫欲由此徑心甚鄙之近何時修忽持吳珪兄弟奏牘來上且以賄進不亟去之是失刑矣詔何時修削官二等罷職送吏部永不收叙 丙寅上曰朕平日未嘗假借內侍而何時修無忌憚如此令已痛懲庶使天下士大夫知所嚮背似道奏聖斷赫然

中外聳聽真足為萬世法 詔諸路監司躬親巡歷州

縣裁決獄囚奉行不虔者臺臣覺察以聞 十二月甲

午朔上曰華亭御莊昨令漕司委官拘催不能戢其擾

今可撥隸外廷以助軍餉似道奏陛下此意真足以貽

謀萬世 乙未上曰治天下之道無他惟順人心而已

我朝以仁厚立國雖強不如秦富不如隋惟知敬以事

天寬以愛民儉以足用平時之所以恪守家法者在此

似道奏陛下守家法結人心真可為萬世龜鑑 辛丑

福建提舉李伯玉奏建陽縣嘉禾生一本十五穗繪圖
來上詔皇太子始封于建允為上瑞其以建陽為嘉禾
縣 上曰此番積雪盈尺臘前再白可為豐年之兆似
道奏既雨復雪遠邇皆然蝗蝻入地疫癘潛消此皆聖
德格天之明驗 內批虎闐齒胄太子事也此禮固已
久廢如釋奠舍菜之事我朝俱未之廢然享師敬道又
不可拘舊制可來年正月擇日令皇太子謁拜先聖

辛酉景定二年癸亥朔御大慶殿朝賀詔曰朕於臧吏

無所貸以其惟威惟虐大為吾民仇民吾赤子而仇之
是與寇賊奸宄同科而何以為天子之命吏古人喻貪
以狼以碩鼠目以物類之惡者蓋不得復言人矣惟彼
貪夫憚莫之懲侵牟矯虔罔知厭極朕夙興夜寐憂苦
萬民封培本根每懼弗詭郡國之吏乃淫縱其欲以蠹
厥生間閭田里淒然人情惻怛甚至自愧朕惟民生寡
遂由於貪官之肆誅求貪官充斥由於監司之不按察
率以外臺耳目不當蔽塞失察之罪茲當歲首咸與維

新上曰我朝以仁厚立國聖聖相承惟以愛養元元培植根本為第一義今中外之吏貪黷成風甚失祖宗初意似道奏大哉王言發於王春之日所以布維新之令也皇太子奏臣恭奉聖旨擇用正月十五日令臣謁拜先聖文宣王于太學臣仰體聖心祇承嚴訓區區愚衷因而感發焉蓋先聖之道至我朝盛時運際文明真儒迭起而後有以續夫孟氏之傳然其時諸說並駕未知統一迨乾淳間文公臣朱熹與宣公臣張栻成公臣

呂祖謙志同道合切思講磨如義利之辨如近思錄之書擇精語詳開牖後學誠有功於聖門中間邪說又幾晦蝕陛下聖德奮興罷黜諛邪表章正學然後人心一正聖道大明天下學士得沿淵源而溯洙泗實萬世無疆之休熹等三臣嘗俱被詔追褒特加隆惠盛典兼準御筆秩熹于從祀如栻如祖謙竊謂宜用升祀例以稱明詔臣愚欲望睿旨特以臣栻臣祖謙秩于從祀之列以益昭聖明崇儒重道之盛美詔從之 都省言知縣

於民最親必五得改官親民舉狀始以命之重其選也
勢利之習燎原薦舉之意浸失挾貴用賄如取諸寄貪
庸得志民不堪命欲窒其源惟有嚴繆舉之罰是遵祖
宗舊制其禁戢薦舉尤當加嚴令吏部日下遍牒遵守
施行仍令御史臺常切覺察 乙丑以安慶城成馬光
祖特轉兩官仍令學士院降詔獎諭 庚辰上曰近聞
江西湖南楮幣價虧臺疏及此可斟酌行之似道奏此
事關繫頗重容熟議奏聞 詔下諸路提舉司所部州

縣時以常平錢米賑給鰥寡孤獨之民 以雪寒出封

樁庫十八界楮幣三十萬賑都民三衙諸軍亦如之

二月癸巳朔詔禮部貢舉 己酉上曰諸書將備進呈

有日只照凡例修纂不必用己意置議論其間他日自

有史官任刪潤之責 京湖制司言襄陽帥臣程大元

調遣總管唐永堅牛全深入鄧光大路至茱萸園獲捷

詔永堅進官四等帶往閣職全進官三等其餘立功將

士補轉有差 甲寅皇女進封周國公主 三月壬戌

朔日有食之太史言陰雲蔽遮初不見虧乞照國朝故事班賀上曰日食于朔朕心懼焉陰雲偶蔽豈當自幸所宜益謹天戒其令百官毋賀 己巳詔禮部國子監以有出身人附銓試場應詞學科照嘉熙二年例從之戊寅似道等上孝宗皇帝光宗皇帝寧宗皇帝實錄今上皇帝玉牒日厯會要經武要略詔似道熠龍榮炎各進官二等 丁亥雨 詔朱熠以觀文殿學士知建寧府提舉洞霄宮 乙丑詔寶章閣待制方來奉祠日

久高年可尊特賜金帶 四月乙未以皮龍榮參知政

事沈炎同知樞密院事無權參知政事諫議大夫何夢

然簽書樞密院事 丙申詔呂文德分閫年餘援蜀餉

蜀忠勞尤著進太尉京湖安撫制置大使夔路策應大

使知鄂州 詔董槐以觀文殿大學士提舉洞霄宮進

封永國公 己酉詔諸路提點刑獄以五月按部理囚

徒 詔吳潛居住循州 丙辰詔皇女周公主年已踰

笄下嫁禮也承奉郎楊鎮寶慈明太后姪孫矜持好修

宜在選尚朕志久定而公主引辭甚力勉諭再三徐始
稟承令三省討論典例以聞 丁巳詔楊鎮左領衛將
軍駙馬都尉 己未太常禮院上周國公主下嫁典例
詔主婚親迎同牢之禮並從熙寧制 庚申詔公主下
嫁與芮主婚皇太子從送仍賜公主擔子其從物令所
司照典禮應辦 是日建康府言瑞麥五莖各兩歧
五月壬戌朔詔公主下嫁以楊鳳孫為賓 癸酉詔放
特班改官人免引見 己卯上曰昨觀李庭芝申逆鄒

突至淮安對境猶幸有備挫其鋒繼此當無日不備庶
可無患似道奏謹遵聖訓益加申儆 己丑上曰雨意
未已朕心惕然應有寬恤之事可更與講行 命侍從
卿監日一人禱于天竺山郎官詣霍山 蠲大理寺三
衙臨安府及兩浙州軍建康府贓賞錢出豐儲倉米五
萬石賑都民再錄中外繫囚杖以下釋之 六月辛卯
朔上曰連雨不已罪在朕躬惟有修省以回天意似道
奏變理陰陽三公之職臣無所逃罪 癸巳上曰昨日

未時至中夜雨略止早又復作寬恤之事雖已舉行更
當求所未至似道奏陛下焦勞如此雖禹湯罪已殆不
是過臣等輔政乖疎未回天意恭俟汰斥 甲午御筆
霖雨為沴天戒孔昭農功苟虧民命攸係力行寬恤精
意禱祈靡事不為厥應猶爽痛念及此啓處弗遑可自
六月五日為始避正殿減常膳徹樂庶盡修省之實以
回陰陽之氣上曰連雨未止都民被水殊可念恐兩浙
皆然各郡量與輕重等第支給賑恤 乙未詔出權貨

務十八界楮幣五萬賑三衙諸軍 丁酉詔武臣功勞

顯著者賜金帶素有格法不許自陳從都省之言也

癸卯上曰楊蕃孫屢辭盥饋之禮此典禮所在豈容不講似道奏仰遵聖訓令勿更請 乙巳上曰近畿被水

安吉為甚宜早差官檢視凡救荒之政皆當講行似道奏安吉今歲之水不減寶慶年間檢視救荒實不可緩

丙午雨雹 戊申羣臣請御正殿復常膳表三上乃

從之 上曰瀘南劉整之變宜急措置似道奏昨日已

即調遣且趣呂文德俞興等任責討之整驍將號鐵胡
孫斷橋之役曹世雄功第一整次之大將呂文德忌二
人据世雄罪逼以死整懼禍及已遂叛歸北

謚議曰劉整宋驍將也已未北師渡江止遷蹕之議
者丞相吳潛也盡守城之力者帥臣向士璧也奏斷
橋之功者曹世雄其一而劉整次之事平後似道功
賞不明殺潛殺士璧殺世雄整守瀘州懼禍及已歸
北之心
始決矣

己酉以范文虎主管侍衛步軍司 辛亥錄中外繫

囚杖以下釋之 壬子流星夕墜 七月丙寅上曰近

雪川水道間有借糧之風亟當區處似道奏昨已諭帥臣警捕擇其尤者重治庶可少戢當併守臣申嚴之

京湖制司言呂文德報發勘正張子光張定國龐伸周仲張善張先以蒲擇之黨從在任贓狀繁夥寇船造橋不調援兵攻擊交通叛逆設意降北乞照祖宗舊制明正典刑詔子光定國追毀除名同龐伸等四人並流斷蒲擇之已追毀羈管監賊是夜月犯斗壬午以觀文殿學士陳韓薨輟視朝贈少師謚忠肅詔吳潛責

授化州團練使循州安置初似道移司黃州也疑出潛
意以足頓地曰吳潛殺我遂深憾之潛竄死沒其田產
寸土不遺潛死非其罪人心不服 丁亥詔賜呂文德
方團一字金帶上曰戚里為太尉方賜此帶今以賜親
臣者待之乃異數也似道奏陛下以殊恩旌有功不特
文德感奮諸將亦知所觀 詔有違年闕正官處許監
司選辟 八月辛卯朔詔令戶部下諸路申嚴州縣增
收租米斛面之弊 癸巳以久雨出封樁庫楮二十萬

賑三衙諸軍發豐儲倉米石濟都民 甲午上曰蜀事
可慮朕甚為之不安似道奏俞興攻取瀘城壞於垂得
致軫聖慮臣累疏自請一行捐軀不辭或可上寬憂顧
上曰丞相所請備見忠忱但廊廟事體至重豈宜輕動
又奏若文德入蜀則荆湖與江面關繫尤重臣不容不
往上又曰此未可輕 丁酉詔奪向士璧從官恩數令
臨安府追究侵盜掩匿情節以侍御史孫附鳳之言也
士璧守潭有全城功似道以其行事不關白宣司也怒

据其罪竄死漳州 壬申詔賜皇女周國公主第于安
濟橋 乙巳詔江萬里為端明殿學士同簽書樞密院
事兼太子賓客 丁未詔浙右水滂民不聊生令朝臣
分往各郡同守臣商確出粟勸分蠲租賦招強壯為軍
凡救荒之政可速舉行俾毋遺闕 九月辛酉上曰湖
秀二郡被水最甚聞守令不以荒政為意民戶各於勸
分宜立賞罰以示信必似道奏此事監司守令不得辭
其責即當宣布聖訓更加戒飭 丙寅以范文虎主管

殿前司劉達主管侍衛步軍司 癸酉詔增潭州解額

三名以終場及萬餘人故也 庚辰詔客販廣米至都

城近境者照市價出糴官司毋得拘勒尋立賞格招誘

壬午詔出封樁庫楮幣一百萬銀三萬兩付四川宣

撫司 丙戌上曰廣米平糴已招誘客販更令本路監

司選官糴運以應都民之乏似道奏謹遵聖訓 十月

庚寅朔上曰邇年和糴止及民戶今歲水潦若此凡御

前莊米亦照民間所科之數輸之有司以示上下一體

之意似道奏陛下捐內莊米以應和糴前所未有觀聽之下孰不感動士大夫於此尚不知體國可乎 戊戌

雷 庚子詔積澇為災省躬惕若哀求民命夙夜靡遑
迺復雷發非時更示譴告天怒未息愈不敢安應軍民
及刑獄有合寬恤等事可疾速討論以聞庶盡應天以
實之意 似道疏乞解機政詔不許 錄中外繫囚

詔物價未平出封樁庫楮幣二十萬賑三衙諸軍出豐
儲倉米五萬石賑都民 甲辰詔朕思己未之秋北兵

渡江其勢飄忽震蕩如風雨之至一時將士或死於轉戰人民或斃於流離其間嬰城自守之臣尤不免干戈鋒鏑之慘致使冤聲滿野積骸如山重念生民何辜而罹此酷禍也當是時賴股肱之臣任旬宣之寄身先士卒冒萬死一生而不顧卒能指授將帥一舉而殄殲之乾坤載寧江山復舊是吾國生民無身而有身此二百年所未有之禍亦二百年所未有之功也朕因修設醮席薦拔沉淪既念元勲示茲獎諭亦欲來者之勸也

丙午以何夢然同知樞密院事兼參知政事 壬子詔

程元鳳為特進依前觀文殿大學士充醴泉觀使兼侍
讀 癸丑詔皇太子年已及冠禮宜擇配慈憲夫人族
昭孫之女生於名門綽有淑德其令擇日入內參見

乙卯上曰太子可謂天作之合又顧太子曰夫婦人倫
之始正始之道當以修身為先其身正不令而行其身
不正雖令不從太子必能體認斯意似道奏皇太子問
學日新况聖訓之嚴如此自能祇承惟謹最是金氏侍

乃父昭孫往復江湖備嘗險艱其處富貴必盡儉戒相
成之道臣等深為國家大慶 賜知渠州胡克忠金帶
以旌戰守之功 丙辰沈炎罷以資政殿學士提舉洞
霄宮 戊午賜汝騰謚曰忠清尋詔贈四官仍賜銀絹
田宅 十一月甲戌安南國遣使奉貢獻象三 戊寅
周國公主下嫁禮成羣臣班賀 乙卯日南至御大慶
殿羣臣朝賀 詔楊鎮宜州觀察使駙馬都尉賜玉帶
詔楊鎮父蕃孫進官二等戚屬增秩進封有差 癸未

詔全氏特封永嘉郡夫人 十二月己丑朔詔瑞雪應
時出封樁庫十八界楮幣二十萬賑都民三衙諸軍亦
如之 辛卯江萬里罷尋以端明殿學士提舉洞霄宮
甲午皮龍榮無權知樞密院事何夢然參知政事馬
光祖同知樞密院事兼太子賓客知臨安府 乙亥月
犯五車 詔永嘉郡夫人全氏可立為皇太子妃令學
士院降制 丁巳詔朕惟我朝褒表功德具有彝典如
趙普有翊戴之元勲則賜第宅於建隆文彥博有弼亮

之偉績則賜家廟於至和令丞相賈似道身佩安危再造王室其元勲偉績不在趙普彥博下宜賜第宅家廟令有司條具以聞

壬戌景定三年正月戊午朔御大慶殿羣臣朝賀 詔陽春肇始宜布寬條如丁大全吳潛誤國之罪固不可貸其與為死黨者當與同科若一時嗜榮進而爭附麗者寧無輕重可斟酌所犯遠者量移近者放還並不錄用 詔皇女周國公主進封周漢國公主 庚申給事

中徐經孫繳章鑑王景齊祠命詔從官予祠而不除職
是祿之而已姑與放行決不錄用 詔周尊黃耆忠厚
所基漢事三老祿養無闕陳壇林彬之史季溫夙被擢
用今皆耆年奉祠歲久宜示獎崇陳壇授端明殿學士
彬之寶謨閣待制史季溫直華文閣各因其祠 戊辰
馬光祖奏今歲監補在即江湖閩廣所至糴價未平乞
照嘉熙二年例權令各路漕司收試從之 庚午賈似
道屢辭免賜第宅家廟詔從所請仍以舊居之鄰集芳

園為賜給緡錢就建家廟 甲戌呂文德言北兵犯梁山權軍李鑑出戰屢捷詔鑑帶行閣門宣贊舍人知軍事立功將士義兵補轉有差 戊寅詔三學免解外行食生負兩赤縣解試終場人及臨安府學職事特令赴省一次以建儲恩優異之也 以久雨出封樁庫十八界楮幣二十萬賑都民三衙諸軍亦如之 都省言逆整以瀘叛宣制兩閩奉行天討已遂收復詔獎諭尋改瀘州為江安軍 辛巳以禮部尚書兼直學士院楊棟

知貢舉兵部尚書太子詹事葉夢鼎同知右諫議大夫
孫附鳳同知無監試 二月丁亥朔李松壽納款上曰
逆鄰一再納款情偽難憑不可苟目前之小安貽他日
之大患切須審處似道奏當與之要約如能歸漣海之
地始足取信 都省言臨安安吉嘉興屬縣水澇溺死
頗衆詔各郡守臣給錢埋瘞 丁酉詔朕試天下士于
春官凡十有三詔矣名公鉅卿胥此塗出朕又表章儒
先崇尚理學以薰陶涵養培植之久莫非夙夜強學以

待問懷忠信以待舉力行以待取者比既謹簡名流執
斯文之柄亦號極一時之選如世之所病勦句斷章以
命題牽合破碎以害理與夫言理不切乎事論事不根
於理皆必無之然不患有司之不明但患有司之不公
明自公出苟至於公則有真才實學當如燭照數計毫
髮莫能遁言刈其楚庸王于成斯為不負朕作人之意
審爾則命陸贄而得韓愈命歐陽修而得鞏軾則予一
人汝嘉賜楊棟已下 戊戌都省言漣水三城已遂收

復制閫之功委為顯著詔獎之仍降德音改名安東州
庚子詔吏部侍郎劉垵累厯繁使備著循良晚入從
班多所裨益今乞引年致仕特除寶章閣待制依所乞
予祠仍賜金帶 壬寅詔呂文德于宣蜀道尅復瀘城
可授開府儀同三司 是日皇姪乃裕特授檢校少保
以皮龍榮為資政殿大學士知潭州湖南安撫使

乙巳月入氏 戊申詔省試中選士人覆試于御史臺
為定制 己酉上曰漣海二城收復於旬日間亦見李

壇納款之真可擬封爵來上 庚戌詔李壇效順本朝
請贖父過既歸連海之境土復獻山東之版圖可特授
保信寧武軍節度使督視京東河北等路軍馬齊郡王
仍賜金鍍銀印二金帶朝服繡鞍馬以金帶牙笏各十
五付李壇分賜將帥 三月乙丑以孫附鳳為端明殿
學士簽書樞密院事兼太子賓客 辛未詔陞海州東
海縣為東海軍 甲戌都省言徐霖自改官後實歷十
餘年不曾陳乞磨勘轉官今已致仕合行旌異詔官其

一子 四月戊戌李璫尋復淄州詔獎諭 己亥嚴州
言麥生兩穗 庚子熒惑歲星合于危 甲辰有流星
大如杯 庚戌以久雨錄行在繫囚 五月丙辰朔戊
午以刑部侍郎無給事中徐經孫工部侍郎無司業常
挺太常少卿無太子侍講吳堅為殿試詳定官 己未
御集英殿策進士 辛酉御射殿閱武舉進士射 丙
寅蠲臨安府稅三月平物價也 丁卯都省言諸路州
縣稅租見錢用時價折納會子以重楮也州縣間有故

行違戾者詔諸路提刑躬視所部違者劾之 戊辰上
曰謝變化折納苗米價太重已戒飭之仍貸義倉充軍
費以免科糴庶可少寬民力似道奏聖恩及此軍民兩
受賜矣 己巳都省言廣西諸郡措置屯田已有小效
若雖欽宜融柳象潯州能一體講行亦可省糴運詔守
臣任責措置經略安撫提領課以殿最仍條具來上

庚午都省言廣西經略安撫司申安南國進貢賀昇平
禮物詔戶部依例給賜 辛未同知樞密院事兼知臨

安府馬光祖除職知福州 壬申上曰馬光祖再尹神

臯殊無善狀朝綱所係豈宜動肆輕紊似道奏宅揆非
才望輕招侮法宜引去陛下曲賜全宥臣惟有恐懼上
曰卿之所爭為公光祖之所爭乃為私 諫臣陳堯道
奏貪吏為蠹者八事而勢家諱徒黠胥尤甚詔戶部下
諸路監司禁戢 甲戌詔周公作詩不避昌發孔子不
偏避二名朕舊名一字乃理學至要五常百行非誠非
也無之可乎先朝如益字實字見之羣臣表章此尤可

證自今其勿復避 丁丑御集英殿賜禮部奏名進士

方山京等勅凡六百三十有七人 己卯賜特奏名進

士勅凡七百四十有三人 六月庚寅以經筵進讀唐

鑑終篇賜宴秘書省講讀官各進秩 詔孫附鳳無權

參知政事楊棟端明殿學士同簽書樞密院事 壬辰

以吳潛歿于循州許令歸葬 乙未月入氏 己亥董

槐乞休致詔除特進 辛丑上曰一雨甚濟旱禾得此

結實似道奏今日之雨甚慰民望昨日臨安屬邑獻新

未更旬日可食新公私之幸也 乙巳御射殿閱正奏

名進士射 丙午閱特進奏名進士射詔祕書省曝書

會權免詔吏部刑部申嚴叙理等事一遵舊制仍令臺

諫監司守臣自今指實劾奏庶幾罰稱其罪 戊申都

省言徽宗皇帝長編一時抄錄尚未成編詔令史館專

官修潤 庚戌安南國王陳日昃遣使入貢表乞世襲

詔日照特授檢校太師安南國大王加食邑男威晃特

授靜海軍節度觀察處置使檢校太尉兼御史大夫上

柱國安南國王効忠順化功臣仍賜金帶器幣鞍馬

癸丑詔謫降臣僚終於貶所者許歸葬 七月丙辰都

省言州縣官最為近民欲其不為民害當先革貪欲革

其貪當先養廉今諸州縣官廩給往往拖壓是驅之使

貪也監司守令但知豐已皇恤他人邇者貪贓之罰既

嚴於屬吏則養廉之俸合責於長官詔令御史臺覺察

其有違戾許屬部官於離任日訴于臺省計贓論罪

壬戌以董槐薨輟視朝贈少師謚文清 庚午以皇女

周漢國公主薨輟視朝五日賜諡端孝太史奏用七月
癸未車駕臨奠駙馬都尉楊鎮奉辭凡五乃從之 乙
亥廣西經略朱襪孫申增築四城內包學舍添置書院
乞照白鹿洞例錫名仍置山長一員詔以宣城書院為
額 戊寅詔文武臣陳乞叙復令吏刑部具元犯上于
尚書省斟酌施行 辛巳詔勅令所重修吏部七司條
法 癸未詔戶部申嚴諸路州縣苛取苗米之禁 甲
申有白氣如足練亘天 戊戌李壇死 己亥詔昨賜

公主田以秀豐莊二萬九千有奇充影堂祭祀餘悉撥
隸淮東總所以助軍餉 壬子以皇太子宫滿歲宮師
以下各進一秩 九月辛酉上曰朱熠言吳門近似秋
暑忽蝗蝻孽生未幾得雨皆殞遂不為害似道奏蝗不
為災皆聖德所感 乙丑詔諸路州郡增差教官當令
經賦各一員 戊辰以沈炎薨輟視朝贈少保 丁丑
都省言温州布衣李元老讀書安貧不事科舉齒踰百
歲乞照令甲特賜撫存詔補迪功郎致仕 壬午賜李

壇廟名顯忠贈檢校太師從兩淮制臣李庭芝請也 閏

九月丙午都省言乞遵嘉定舊制應知縣罪罷雖經赦
不許注緊望之闕仍著為令從之 戊申詔紹興府昨

因延燎令倉司給貸居民錢今經兩年民貧可憫可悉
蠲之 辛亥夜皇太子妃全氏降生皇孫 十月乙卯

詔蠲四川制總州縣醯醢權利三年以都省言循明裡
前例也 丙辰詔蠲諸路州縣折納苗幣不許陽減陰

取違坐紹興條例 庚申沿江制臣汪立信表進蘄城

新城圖詔獎諭 甲子以楊棟為端明殿學士簽書樞密院事兼權參知政事兼太子賓客葉夢鼎為端明殿學士同簽書樞密院事兼太子賓客 甲戌廣西經略朱禕孫奏知歸化州岑從毅納土輸賦獻丁壯為下臣詔改歸化為來安州岑從毅進官修武知州事許世襲丙子詔安豐六縣陞為軍令沿江制司選辟軍使一次以其縣里迢遙邊鄙險要也 十一月壬辰詔奪丁大全貴州團練副使徙新州以其招集游手私立將校置

弓矢舟楫謀不法也丞相賈似道諷廣西經略朱禔孫
殺之禔孫遣將官畢遷護送擠之水 丙申以徐清叟
薨輟視朝尋贈少師 戊戌以夏貴知瀘州兼淮西安
撫副使 辛丑詔禱雪未應出封樁庫十八界楮幣二
十五萬賑都民 癸卯詔免正旦大朝會 十二月乙
卯詔臨安府屬縣三衙決係囚杖以下釋之 庚申詔
瑞雪應時出封樁庫十八界楮幣四十萬賑都民三衙
諸軍 戊辰詔雪寒再給諸軍薪炭錢

癸亥景定四年正月壬午朔御大慶殿羣臣朝賀詔令侍從臺諫給舍卿監郎官以上及制總監司各舉所知不拘負限以待量才擢用後不如所舉則連坐之制宜在必行 戊子詔莆陽布衣林亦之陳藻特贈初品官林公遇贈一官以司農少卿林希逸言三人經明行修欲表勵後學故有是命 都省言四川駐戍諸軍守禦良勞合議優卹詔令制副給賜衣裝布疋有差 丙午上諭輔臣曰陳堯道言詞訴改送之弊民受其害合與

痛革當自戶刑部始似道奏謹遵聖訓 二月壬子朔
詔吳潛丁大全懷姦誤國既速天誅朋附實繁遷謫亦
久宜示寬恩令尚書省日下具兩黨人斟酌輕重 丙
辰刑部言吳潛丁大全兩黨人內已量移程洙胡用存
程垅石正則吳泳汪洵之並自便永不叙用倪壘量移
信州張榮饒州章公權撫州任伯鳳建寧府葉隆禮徽
州何子舉押歸本貫吳衍撫州翁應弼臨江軍趙時詰
衡州劉錫瑞州王立愛信州程若川建昌軍袁玠沈翥

方大猷徐敏子難以量移尋臺臣及給舍疏乞取回吳
衍翁應弼趙時詒葉隆禮何子舉劉錫王立愛石正則
量移之命遇赦永不放還內時詒子舉行應弼立愛正
則各更奪一秩錫已追毀出身仍各於見謫州軍居住
並從之 丁巳殿中侍御史陳堯道右正言曹孝慶監
察御史虞處張晞顏言井田古也而未易行於後世限
田近古也猶足以救今日之急蓋無并之患至今亟矣
奈何時異事殊法出弊生夫三邊列屯非食不飽諸路

和糴非楮不行既未免於廩兵則和糴所宜廣圖既不
免於和糴則楮幣未容縮造為今日計欲便國使民而
辦軍食重楮價者莫若行祖宗限田之制以官品計頃
以品格計數下兩浙江東西和糴去處先行歸併詭析
後將官戶田產踰限之數抽三分之一回買以充公田
但得一千萬畝之田則每可收六七百萬米於軍餉有
餘矣詔從之尋置官田所以劉良貴為提領陳峯無檢
閱先是似道建議國計困於造楮富民困於和糴請官

買公田免和糴住造楮於是始行公田法覈民腹田量
戶多寡以賤直取之農民為官耕者曰官佃上戶為官
督者曰莊官浙右之人破家失業者甚衆 戊午詔祖
宗之制察官邪之外點檢所隸簿書有司稽遲者赴臺
理訴未嘗許信偏詞予奪刑名也茲覽臨安府所勘臺
吏案款違法背理不一而足至於刑人殺人之事亦復
干預察官失所知聞尚且不可惟吏是聽至作訪聞押
帖使善良受害爭苟不示懲何以戒後臺官虞處張晞

顏並與在外差遣 癸亥降詔申飭臺臣 辛未詔會

子庫日增印一十五萬貫赴封樁庫充買官田 乙亥

都省言呂文德浚築鄂岳常德澧州城池訖事詔獎之

守臣韓宣特轉遥郡承宣使蘇劉義吉州刺史以效勞

故也 丙子上諭輔臣曰諸史宜差從官提綱照舊例

於明裡前登進尋差徐經孫 三月辛巳朔詔官買踰

限之田蓋欲永免和糴倉卒取具姦弊滋多可嚴立賞

罰討究歸併庶幾步畝無私易於摘買 丁亥以呂文

德為寧武保康軍節度使開府儀同三司 詔買踰限

田以免和糴之害自是良法美意要當始於浙西庶他
路視以為則但所在利病不同亦難拘以一律令三省
參酌施行 賈似道丐祠詔不許參知政事何夢然等

奏切見右丞相意在娛親抗章丐去臣等固知陛下決
不容似道之去臣等私憂過計謂丞相非惟不可去亦
不可言去國勢方定事會方殷丞相之不可去上下通
知但丞相丐去小人便動彈冠之興欲乞陛下力賜勉

留曲加勉諭俾丞相母更入䟽庶安人心而弭外邪從之己未權吏部尚書陳昉等奏乞勉留丞相賈似道詔從之庚寅侍御史陳堯道右正言曹孝慶奏江公望居言路曰有云君臣一體人君元首也左右大臣股肱也諫官御史耳目也股肱不留元首何賴耳目之官豈容自默乞陛下申諭勉留天下幸甚詔從之右丞相賈似道奏條陳田制凡九乞下臣此章俾議其可必卿士庶民之皆從是之謂大同亦安得獨異哉甲辰

上諭輔臣曰陳堯道言釵銷偽造當嚴加禁戢似道奏
不禁釵銷則見鎡愈少不禁偽造則楮幣愈多臣等仰
遵聖訓 丁未詔寧國府守臣趙汝謀推行經界職事
修舉陞直華文閣因其任 四月丙辰詔今年九月有
事于明堂 甲子詔呂文德分閫上游寬朕西顧疆場
之事知無不為帑府所積久而愈厚令其子師夔稟陳
欲備公上取用朕但聞閫外仰費於朝廷未聞朝廷取
費於閫外所請既切難違其意可於內截撥二百萬充

今年制總糴本 乙丑皇太子言恭聞經筵春秋徹講
在邇乞令陪侍觀禮從之 丁卯以明堂奏告于天地
宗廟社稷宮觀 丙子都省言回買六郡公田視畝租
之多寡為支價之低昂乞以官誥度牒銀會四色參酌
支給詔令封樁庫支撥付各郡守臣等第給還 五月
辛丑都省言婺州布衣何基建寧府布衣徐幾皆得先
儒理學之傳年高德劭隱居丘園詔基幾各補迪功郎
基特添差婺州教授兼麗澤書院山長幾建寧府教授

兼建安書院山長

壬寅以經筵進講春秋終篇賜宰

臣經筵官宴于秘書省

六月庚午賈似道等上徽宗

皇帝長編寧宗皇帝實錄日厯會要經武要略 乙亥

似道辭免進書恩凡四奏詔回贈五世祖進士昱為太

師祖妣季氏廣國夫人繼妣徐氏延國夫人夢然等以

辭詔各進二秩餘令回授 七月甲申詔吏部具諸路

見闕知縣不拘常格限十日許人指射限滿無人注者

令監司郡守列銜奏辟一次 乙酉詔秘書省自淳熙

至嘉定國朝會要皇朝長編刊梓頒行 壬辰勅令所
進呈寧宗皇帝令上皇帝寬恤詔令詔提舉官賈似道
等各進二秩 甲辰皇太子奏乞以新除起居郎留夢
炎前江東提刑召赴闕范東叟充講官 是日上謂輔
臣曰皇太子以講官闕負欲以夢炎東叟充選夢炎舊
在資善堂東叟亦有時望所奏甚當似道等奏二人皆時
望此舉於儲德愈有光臣等不勝贊慶尋以夢炎兼諭
德東叟兼舍人 八月戊申朔詔戶部申嚴諸路州縣

苛取苗米之禁 以賈似道為明堂大禮使何夢然禮

儀使楊棟儀仗使葉夢鼎鹵簿使與芮橋道額遜使

辛酉詔皇太子宮滿歲宮賓講官各進一秩使臣以下

減年給犒有差 庚子都省言中外支用粗足已行減

造會子今置公田免糴本又合減造詔每日更減五萬

壬申都省言明禋恩霈例蠲前三年逋賦而州縣往

往有已催在官吏幹隱匿在已者其實百姓不需毫髮

之惠漢史有除明年田租之令最為得宜今倣而行之

庶幾實惠及民乞下諸路州縣蠲前三年逋賦外更預將景定五年畸零稅色與免半輸載為赦條仍令各路漕司榜諭從之 甲戌詔省罷平江府發運司 九月

庚寅朝饗太廟 辛卯大饗于明堂赦天下 甲午以

何夢然知樞密院事兼參知政事楊棟同知樞密院事權參知政事葉夢鼎簽書樞密院事 乙未都省言諸

路州縣獄訟率多枝蔓淹延今遇明裡肆赦有司所當奉行踈決以稱寬典詔令各路憲臣決所部繫囚具已

結絕名件上尚書省 詔呂文德乞以大禮所得京官
恩澤改奏次子夔已從其請朕思文德忠勤宣在中興
功臣之下師夔已除知閤且屢典邊郡但換京官亦非
朕所以待忠臣之意今特與換朝奉大夫尋為度支郎
官 丙申昌化縣以嘉禾嘉粟進時明裡慶成上謂休
瑞應期一德感通之驗詠詩賜丞相 詔賈德生去歲
不能防閑所使丞相忠於體國不私其子必欲示懲朕
嘉其嚴訓姑從削秩天下皆明知大公之意今已及暮

可特叙復元官予祠 十月己酉詔安吉嘉興平江常

州江陰鎮江公田諸莊輸納什優其一以都省言納稼
之始宜寬恤故也 壬子車駕詣太乙宮赴座官賜醴

簪花 己未詔出封樁庫十八界會一百四十萬下六

郡置公田莊屋 乙丑詔刑部應内外文武官因風聞

致罪者許申理于朝參酌改正犯贓私者令監司覈實

來上 癸酉都省言令會子庫造三色零百錢關二千

萬便民旅交易從之 乙亥詔李獻可等精加校正徽

宗皇帝長編刊梓于祕書省 十一月戊寅朔詔度支
郎官呂師夔往沿江閱視屯兵營屋招募新軍仍督未
備者具奏來上 庚辰詔羣臣遵依舊制五日一輪對
如遇急則痊日補對不許推托求免 壬午軍器監丞
方演孫進對論羣臣緘默之弊上曰朕未嘗諱言演孫
奏天下莫不知陛下之能聽言特臣下不敢言爾如啓
悟發於宸衷施行見於明詔天下翕然孰不服陛下之
聖 丙子詔兩浙運司臨安府屬縣決繫囚杖以下釋

之臺臣朱貌孫言郡邑主學添教間有分爭殊失揖遜之風乞下諸路提舉司分隸職事立為定式庶可養靖共之習從之十二月丁未朔詔正旦大朝會權免詔應官司見監公私逋欠並倚閣一月繫人釋之以雪講行寬恤也戊申詔舶務出售權貨以收弊楮仍禁乞取己酉詔皇太子宫詹事以下講讀外日輪一員辰入酉出以備咨問以稱輔導之實辛亥詔兩浙監司將所部州軍縣繫囚杖以下釋之甲寅蠲兩浙

州軍及建康府見監贓賞茶鹽錢 丙辰詔諸路憲司

索上所部州軍大辟獄案詳情論決毋使滯淹其干連者酌量釋之 丁巳登聞檢院朱濬進對論修身之要

上曰修身在端本為上濬奏誠如聖諭心者身之本身者天下萬事萬物之本先臣朱熹之說正如此上然之

己未詔刑部下諸路憲司所部州縣刑獄不許慘酷

箠楚及毀除非法獄具違者重寘于罰 辛酉詔管景

模主管侍衛步軍司 丙寅詔無為軍巢縣已陞為鎮

巢軍使從汧江制司節制其月收坊場河渡錢分項起
解支遣以制司申言也 己巳諫臣陳堯道乞下福建
倉司將景定元年至三年八郡義倉米斗以十七界會
兩貫賑糴貧民從之 庚午詔瑞雪應期出封樁庫十
八界楮幣四十萬賑在京軍民詔臨安府兩浙運司二
衙決繫囚杖以下釋之 都省言知海州張漢英在任
浚築壩塲城壁竣事其子宗仁奉圖來上具見勞績詔
張宗仁特與帶行閣門祇候添差京東路將餘在役者

令兩淮制司類申樞密院 辛未太白歲星順行 癸酉詔再給諸軍諸司薪炭錢 丙子臨安府帥臣吳革奏獄空詔獎之

甲子景定五年正月丁丑朔御大慶殿羣臣朝賀詔朕粵稽盛帝明王制治保邦曷嘗不以人材為先務蓋雖堯舜之法度文武之方策苟非得人是迪是懋則亦徒法而已故必賴濟濟之賢藹藹之士布列中外道德一而風俗同然後可望其舉行不悖相維於長久也我國

家因唐之舊進士一科得人為盛三百年間所以保乂
王家垂休億載者厥功茂哉弊久蠹滋邇年尤甚非無
佳士穎出由此其選然窮經學古者或病於詞華植德
礪行者難究其蘊奧高才大器者往往局於纖悉繩墨
之末是以官甚冗而才愈乏家殊俗而風益漓至於冒
國法以苟營假儒冠而挾冊俚言亂雅勦說趨時使習
之者反賊其良而取之者莫任其咎人情至此咸欲變
通蓋嘗披閱先朝名臣奏議其論取士之法非一惟程

顥頤兄弟深知治道酌古通今綱條詳明用意純切令
三省詳議參酌其可行者條具以聞務於科舉令甲無
大更張以安安士心而於進士舉之外所以崇尚經術
考察德行選用材能之道立為一代之典陶成四方之
風庶幾豐芑之仁垂之萬世顧不美歟 癸未給事中
常挺言乞遵祖宗典故應文武臣寮封章並許於通進
司投進以達羣下之情毋使伏闕投匭與庶民等詔從
之 出奉宸庫香珠犀象等珍貨付務場賣易助收弊

楮 辛丑詔公江兩浙制帥監司不許差軍功借補挾
術遊謁等人權攝害民如州郡闕貲則差曹職官屬縣
闕貲則差丞簿尉時暫兼權仍催正官之任或有違戾
令臺臣覺察以聞 二月丙午朔詔昨者諫疏戒飭百
司盡公守法指緘封事目最為病源深中累年積習之
弊邇日効及都司具有實狀所當申嚴禁戢俾各自愛
毋陷匪彞以速厥辜 丁未詔禮部貢舉 辛亥檢正
陳昉言陛下欲賞信罰必莫若嚴考課之法乞明詔有

司下之諸道帥臣監司歲考郡守歲考縣課第其能否
優劣功過於次年三月類聚保奏監司則有互申之法
宜悉遵彝典詔從之 是日雪 丙辰韓禾洪天錫並

兼侍講趙景緯兼崇政殿說書 丁卯詔諸路申嚴州

縣斛面之禁豁除義倉陳腐米數椿積邊郡三年軍餉
行臺臣之言也 是夜月犯斗 辛未雨土 詔梁椿

選右正言程元岳朱應元並監察御史 四月丙午詔
管景謨屢立戰功為時名將妻孥陷歿効忠愈堅聞平

時所得俸賜率以撫卹將士遂至窮空此尤可嘉特賜
十七界會三十萬以示旌勸仍賜金帶許令服繫 辛
亥詔禮部下諸路州縣講行鄉飲酒儀以復古意仍以
己行儀式上于尚書省 癸丑詔諸道提點刑獄以五
月按部理囚徒 乙丑詔知樞密院事無參知政事何
夢然罷觀文殿學士沿海制置使馬天驥罷行臺臣之
言也 己巳以李曾伯知慶元府沿海制置使江萬里
為資政殿學士知建寧府 庚午太白歲星合于婁

詔徐宗仁兼崇政殿說書

五月丙子詔朱應元除右

正言兼侍講饒應龍除監察御史 己卯詔何夢然為

資政殿大學士知建寧府 辛卯以楊棟參知政事葉

夢鼎同知樞密院事兼權參知政事姚希得為端明殿

學士同簽書樞密院事兼太子賓客 乙未詔安南國

表貢方物其所進象及華靡之物令有司却還仍優賜

答之 戊戌都省言公田所諸莊砧基已成若復以州

縣總之恐害不除而利不可久宜選差廉能官分司管

幹詔平江嘉興安吉各一員常州江陰鎮江共一員未
作縣人充幹辦公事已作縣人充主管文字繫銜仍令
條具合行事宜來上 己亥太白晝見經天 癸卯詔
學士院每日學士與講官照舊例詣院宿直并申嚴六
曹郎官入局部宿之制 六月甲辰朔詔衢州守臣謝
堅奪官三等褫右文殿修撰永不收叙以其寇至不禦
委城而去故有是命 臺臣朱貔孫等又言詹沔之變
皆由謝堅苛征激之乞行鐫斥中書舍人留夢炎又言

謝墜罪大罰輕乞更與勒停並從之 丙辰詔王鑰洪

天錫控辭甚力令各州守臣以禮勉諭勉其赴闕 詔

容州守臣戴應復奪官五等勒停羈管惠州以其苛取

致激妖民聚衆劫掠尋令經略司追勘具情節 癸亥

都省言申嚴祖宗戒飭賊吏之制詔百姓為賊吏患苦

至此已極朕甚痛之指揮務在必行勿復文具 七月

甲戌刑部大理寺言朝奉大夫監行在權貨務都茶場

分權真州周福孫於鹽鈔茶引正官錢外竊增事例錢

四十二萬七千有奇入已係監主詐欺從自盜法贓罪
抵死詔特貸命追毀勒停免真決不刺面流二千里追
贓 是夜彗星出柳長竟天 乙亥皇太子妃全氏降

生皇孫 丁丑詔朕以寡昧統臨兆民居多厯年祇畏
天戒如日常恐不德謫見于上乃七月甲戌彗出柳
宿譴告孔昭目所共睹鑒臨有赫咎在朕躬豈朝多闕
政未當人意吏不宣化莫安民生獄訟弗清而多冤貪
酷未除而貽害遂至乖戾上干天和朕將避殿減膳應

中外臣寮並許直言其合施行等事有司條具以聞

詔出封樁庫十八界會二十萬賑都民三衙諸軍亦如之內司宿衛應奉人併特給犒一次以示優卹 戊寅

詔江萬里知福州福建安撫 以降生皇孫奏告天地

宗廟社稷諸陵 己卯彗星退于鬼 辛巳彗星退于

井 甲申行都大火 丁亥賈似道屢疏乞罷政詔不

許 癸巳少保保寧軍節度使萬壽觀使祁國公謝奕

昌乞休致詔特除少師進封魏國公 甲午以謝奕昌

薨輟視朝尋贈太保追封臨海郡王賜諡莊憲 是夜

填星守畢

詔馬天驥褫觀文殿學士罷祠其子馬時

楙奪一秩罷新任行臺臣之言也

乙未詔參知政事

楊棟罷行臺臣之言也尋除職予郡

丙申詔令侍從

兩省於內外官舉堪充監司郡守者疏其實以聞令中

書籍記遇有闕官精加審察取旨擢用如犯贓私當正

謬舉之罰

丁酉命從臣卿監日一負禱雨于天竺山

郎官詣霍山

戊戌蠲中外茶鹽贓賞錢

彗星退于

參 八月壬寅朔詔戶部申嚴諸路州縣增收苛取苗
米之禁 是夜熒惑填星合于昴 甲辰詔壬戌別院
董試臺臣縱游士假手物論喧嘩今春銓闈復然尤為
無忌秋闈在邇可令御史臺嚴為關防毋踵前弊 乙
巳詔舒有開左司諫兼侍講 丙午詔湯舉兼崇政殿
說書朱貌孫兼侍讀翁合兼侍講 己酉都省言知嘉
定府洪濤迎奉新繁縣太祖皇帝以下六朝御容于本
府天慶觀一時權宜於禮未備詔令守臣選差武臣一

負擇日迎奉赴行在所奉安合行典禮令有司條具上
于尚書省 庚戌彗星退于參 丙辰詔皇太子宮滿
歲宮師宮賓詹事以下各進一秩醫官使臣減年支犒
有差 戊午彗星退伏 庚申羣臣奏請御正殿復常
膳表凡三上乃從之 甲子彗星復見于參 彗星不
滅上封者指言公田之咎臨安府學士葉李蕭圭等上
書詆似道專權害民誤國似道怒嗾士人林德夫詣京
尹劉良貴告李等用金飾齋扁不法捕寘之獄黥竄漳

州

謚議曰昔太祖嘗曰宰相須用讀書人似道以寵妃之弟不學無術處非其據乏休休有容之量忌疾之念橫於胷中好諛惡直進佞退賢粉飾太平諱言邊事殺功臣以失士大夫之心行公田以斂江浙之怨主推排以騷動東南之民覆士籍以鉗制東南之士庇敗將則將校之心離各軍券則軍旅之心叛日積月累無一而非失人心之事卒至滅國覆身擢髮不足數其罪

乙丑以姚希得無權參知政事 己巳詔師在輿陞辭

精神不如昔蓋郴州溪洞所係可別與差遣以優其老

辛未彗星化為霞氣 九月己丑日生格氣 是日

雷 癸巳詔內侍李忠輔奪二秩罷 己亥詔程元岳

右正言無侍講張桂監察御史 十月乙巳朝獻景靈

宮 丙午月犯斗 庚戌詔冬至朝會權免 辛亥詔

十七界會浸輕並以十八界會易之限一月止 乙卯

蠲臨安府稅三月 乙丑詔物貴原於楮輕楮輕原於

楮多今以見錢關子復中興舊法每百七十七足陌以

一準十八楮三千草錢楮虧折之弊其官吏諸軍券請

並以見錢關子全給 似道請秤提楮幣改造金銀見

錢關子以一準十八界會子之三十七界廢不用關子之制上黑印如西字中三紅印相連如目字其下兩旁各一小長黑印如兩脚宛然一賈字也關子行物價頗踴上有疾不視朝丙寅命官分禱于天地宗廟社稷宮觀詔出封樁庫錢關二十萬賑都民諸軍亦如之詔朕體違和服藥未效如草澤有能治療得或痊者白身除節度使有官人及願就文資者並與比附推恩外更支賜錢十萬貫田五百頃三省出榜曉諭許徑

赴麗正門外自陳差內侍二員收接文字即時聞奏
內降赦曰朕顧畏民罔祗膺帝監朝乾夕惕迪惟遺大
投艱日邁月征永念志勲道遠若臨深而履薄迄去危
而就安幸國步之小康乃朕躬之少爽端由積慮以致
愆和宜特持於刑章庶助收於藥喜集於多福荅爾羣
情可大赦天下於戲人莫不欲生冀道迎於善氣天所
助者順永孚佑於丕圖咨爾多方體予至意 丁卯上
崩遺詔皇太子溫文夙著仁孝有聞陞儲副者五年久

參裁於庶務宜自春宮而嗣服允符至道之舊章可於
柩前即皇帝位皇后佐佑朕躬章明坤載可尊皇太后
應軍國事務並聽皇帝處分爾其式遵成憲誕受多方
益奉母儀恪承慈訓皇帝成服三日聽政喪紀以日易
月羣臣共為寬釋勿過權傷百官入臨並隨地之宜諸
道州府長吏以下三日釋服在京禁音樂百日在外一
月無禁祠祀嫁娶沿邊不用舉哀山陵制度務從儉約
應內外諸軍支賜及其他不在詔中者並聽皇帝處分

於戲人羨久生奈盈虛之有數天惟純佑繫付託之得人更賴股肱元臣文武列辟交修不逮協贊丕平咨爾羣倫體予至意 尋以王倫麥卿充都大提舉喪事

謚議曰玉休哉四十一年之間日恒月升謹終如始美成在久四方咸仰於垂裳道遠與遊萬秉處同於脫屣三靈變色九有摧心天不可梯民之無祿遠日有期南郊是請宜配雅頌宜襲春秋謹按謚法秉德遵業曰烈經天緯地曰文施仁服義曰仁保大定功曰武聰明文思曰安協時肇享曰孝述夫十有三年之大業是承四十餘年之治體不變非秉德遵業乎宸文睿藻之昭回龜圖洛書之流布非經天緯地乎勸廉恤刑拔賢去佞非施仁服義乎長筭遠畧動中事機內憂外患迄就底平非保大定功乎步道深而情

偽洞察在御久而典則昭明超然遠覽惟懷永圖非
聰明文思乎父天母地敬事敬享內則盡志外則盡
物非協時肇享乎越廟號之建久矣道德仁義皆帝
王之徽稱也而未聞有以理為號者稽之謚法曰慈
惠有德而已理之為義而止於斯也不既淺乎太極
理之根源也二氣五行理之流布也天下萬事萬化
皆於理乎出而君師則主張乎是先儒則講貫乎是
也自我藝祖皇帝開國之初與韓王趙普發明道理
最大之說由是本朝治體之純道學之粹遠同三代
慶厯嘉祐間豪傑並出濂洛之學上接洙泗熙寧之
用程顥元祐之起程頤紹興之聘尹彥明紹興之召
朱熹列聖相傳皆欲表顯而尊崇之矣奈之何王安
石則邪說誣民也秦檜韓侂胄則姦臣擅國也以新
經字說胥天下為黃茅白葦則安石之為也反國事
雖率獸食人謂學為偽謂道為禁則檜侂之為也理
學之廢興關於世道之消長可勝言哉先皇帝自初

踐阼始卽講筵卽未嘗以名呼先儒若周元公頤則曰濂溪張邵伯載則曰橫渠二程則曰伊川明道而尤為尊用朱文公熹之四書自時厥後或錫之美謚或贈之封爵淳祐視學首詔祀五臣而斥荆舒熄邪說正人心為去聖繼絕學為萬世開太平製緝熙一記製道統十三贊造詣精矣書無逸一篇書思無邪毋不敬六字儆戒備矣其土苴既足以治天下其精微又以傳之聖子資善堂有記元良有規道心精一之旨悉在焉下南宮十有二詔而未嘗不以義理之學飭有司擢科目近萬人而未嘗不以義理之文造多士中庸大學之書周程張朱呂之說家傳而人誦之士生斯時爭自濯磨以通經學古為先務以窮理盡性為大原可以淑羣心可以支世變雖有搶攘紛紜而國家基緒屹然不少動搖者以我之本領端正而功用宏闊故也嗚呼往古來今內聖外王一正理而已發揮正理不在孔孟乎微闢洛諸儒繼之則大


道之與異端果孰勝而孰負哉主張正理不在我朝之列聖乎微先皇帝繼之則聖傳之與俗學果孰顯而孰晦也會羣獻之精蘊訂百家之異指接二帝三王羣聖人統宗會元之粹而掃秦漢以來千數百年習浮踵誤之失謂非有功於是理乎理也者天之所為而非人之所設也聖人奉天命之性躬率性之道而闡修道之教有功於是理者即有功於天也上帝臨汝無二爾心忠臣孝子於此時而稱天作謚也可以端拜而議矣尊謚宜天錫之曰烈文

仁武安孝皇帝廟號理宗臣等謹議

覆謚議曰巍巍乎沈沈乎將欽崇於陽陞用作翬於彌宮解編毫絡若為模繪夫理功之基也功理之興也其來也幾微易簡其究也廣大堅固是或一道也循天下之理之謂道繼去聖之絕學昭皇王之大紀非建乎得天下之理之謂德四十年之深積一太極之渾全非備乎道見乎變之謂功海內之治皆上世

所難及非大乎道之燦然之謂興景定之元號為天
下重開非復乎理無所不通也天運神化博施濟衆
之方非聖乎理無乎不燭也宇定光發恢廣覽無聽
之公非明乎合烈文仁武安孝之號為尊明令顯隆
盛之稱萬古在前億載在後無一息非天理之流行
也勒之崇鴻寫之琬琰薦之上帝昭我理宗上配藝
相與天無極臣謹拜手稽首請上徽號曰理宗
建道備德大功復興烈文仁武聖明安孝皇帝

詔以明年正月一日改為咸淳元年大赦天下



宋史全文卷三十六